

Nelson Oduber lo bira e Promer Ministro di Aruba

ORANJESTAD (AAN)- Lider di M.E.P. sr. Nelson Oduber, den un entrevista cu DIARIO a bisa cu e ta sumamente orguyoso di ta lider di partido M.E.P. pa motibo cu e ta considera M.E.P. un partido prestigioso. El a bisa cu tur hende por corda loque a pasa dia 22 di November 1985 cu apesar di tur circunstancia, M.E.P. a keda e partido mas grandi na Aruba.

Sr. Oduber a bisa cu tempo cu e gran lider sr. Betico Croes, q.e.p.d. a fallece, cierto medianan a publica cu tabata pa motibo di M.E.P. Tres aña largo, segun sr. Oduber el a guia e partido y el a hiba un politica di tene e partido hunto y masha agresivo den parlamento. Tambe rondona e partido cu hendenan cu por yuda e partido crece. Y e resultado di dia 6 di Januari ta asina bon pa M.E.P. caminda cu ariba e lista a haci 16 cambio y cu e candidatonan a traha cu entusiasmo increible cu a muestra cu tur tabata sigur cu eleccion aki M.E.P. lo haya un resultado hopi bon. Por a mira tambe cu si M.E.P. a logra haya 23 voto mas, e lo a haya 11 asiento.

Lider di M.E.P. a bisa cu e ta sumamente contento cu e resultado, tanto pa e total di votos cu el a haya y tambe pa locual cu e pueblo a vota pe. Sr. Nelson Oduber a bisa cu locual ta trata e partido A.V.P. mirando e campaña cu nan a hiba a sufri un derota, e aspecto cu nan a maluza Tele Aruba y otro medianan di comunicacion, por bisa cu M.E.P. a sufri hopi tres luna y poco tabata e medianan cu a duna M.E.P. mas cu 5 asiento.

Mirando tur locual cu a pasa den e ultimo dianan aki, y hasta dia di eleccion cu nan Hulanda a sali cu A.V.P. ya caba tin 11 asiento y den seno ta ser calcula pa 13 asiento, sr. Nelson Oduber ta considera e victoria di M.E.P. aplastante y un reconocimien to na su liderazgo cu a mantene e partido hunto cu a sa di busca bon candidato y tur hunto lo haya credito grandi pa e logro di M.E.P. Pueblo a vota pa e partido cu tin e lema "Un Futuro Brillante pa un tur" y M.E.P. ta di pueblo cu pueblo y pa pueblo.

Apesar di tabata den oposicion y cu poco medio financiero, presion economico, segun sr. Oduber e manera con pueblo a vota berdaderamente el a keda sorprendi pa e apoyo asina grandi. Segun sr. Oduber



pa e Arubiano e honor y dignidad a conta mas hopi pe cu placa, mas hopi cu propagandan politico, mas hopi cu e tanto cuponan di trabao cu gobierno tabata caba cune. Y pa A.V.P. sr. Oduber a bisa cu e ta kere cu esaki ta e muestra cu hamas ni pafor di gobierno ni den gobierno nan no a gana un eleccion y awor nan a bolbe perde eleccion, cu tur aspectonan na nan favor.

Sr. Oduber a bisa cu Dialuna anochi den seno di M.E.P. lo bay discuti ariba e resultado di eleccion den e sentido cu con e candidatonan mes a mire ariba un futuro programa cu M.E.P. lo desea di mira ehecuta den e gobierno cu lo ser forma como puntonan di urgencia. Awor aki no lo bay determina bao ningun forma kendenan lo ta candidatonan pa ministro, pasobra M.E.P. ta considera cu e acuerdo politico pa evolucion ta importante y a base di un programa cu lo worde ehecuta M.E.P. ta considera cu su hendenan ta suficiente capaz pa ocupa puestonan di Minister nan.

Pa kita cualquier duda cu tabata circula sr. Oduber a bisa cu como lider cu a guia e partido M.E.P. na un victoria aplastante, siendo den oposicion contra tur expectativa di varios instancia, e ta considera cu e tin un compromiso cu e pueblo y un reto pa bay cumpli cu ne. Y pesey e ta declara cu for di awor cu ora M.E.P. ta cla cu e coalicion y tin un programa cu lo sirbi interes general su persona lo asumi e puesto di Promer Ministro di Aruba y e otro ministernan lo worde determina pa consejo di partido.

Sr. Oduber a sigui bisa cu e ta spera di haya cooperacion di un tur ya cu M.E.P. tin hendenan suficiente capaz pa bira Ministro, no tin nodo pa crea ningun expectativa pa awor aki stroba M.E.P. den e tranquilidad pa forma un gobierno. Di awor aki caba e otro partidonan sa kico nan a pasa aden cu A.V.P. y e intencion di M.E.P. ta pa ningun momento kibra partido chiquito. Mester traha den un comprendemento mutuo, pa asina por goberna Aruba pa e 4 añanan venidero.

Ayera tardi sr. Nelson Oduber tabata tin un encuentro cu Gobernador Tromp, y ayera nochi lo reuni den seno, pa asina acerca e partnernan cu nan ta quere cu forma un coalicion cu M.E.P. Sr. Oduber a bisa cu te ainda ta poco prematuro pa bisa cual ta e partnernan, pero A.V.P. a exclui su mes bisando cu e no ta traha cu M.E.P. y A.V.P. a papia pa P.P.N. tambe bisando cu nan dos tin un pacto.

Sr. Oduber a bisa cu e lo kier tende di P.P.N. kico ta e pacto cu A.V.P. y M.E.P. lo bay papia cu e otro partidonan cu ta P.P.A. y A.D.N. y lo mira e ora con e base ta pa sigui papia.

Un di e puntonan mas importante pa M.E.P. den e proximo gobernacion ta loque nan a logra dia 20 di November cu Exxon, unda cu nan a logra convence Exxon pa crea 300 cuponan di trabao industrial pa Aruba, pariba di brug, plus duna Lago Colony pornada y haci e lugar limpi. Sr. Oduber ta considera cu den 30 dia di e proximo gobierno lo mester haya otro, pasobra M.E.P. no tin e necesidad di hiba Exxon dilanti di Huez, hiba un caso cu

lo dura mas cu 10 aña.

Di dos prioridad ta e asunto di petroleo. M.E.P. lo traha sigur sigur ariba esey, pasobra petroleo por trece otro actividadnan industrial pa Aruba, y esey mester worde explora profundamente. Di tres ta e ley pa centro financiero cu merece cambio pa Aruba bira un centro financiero completo.

Un di e otro prioridadnan ta e aspecto di turismo. Mester percura pa yena e 6 Mil cambernan cu vuelonan regular, mehora e calidad di turista cu nan ta gasta mas cen na Aruba. Den e ultimo 3 aña ta increible e suma cu e turista ta gasta na Aruba. Elimina e inseguridad di e trahadornan den hotel unda tin continuidad di trabao. Den e sentido cu gobierno, sindicado y dunador di trabao di buena fe mester bay coopera cu otro pa duna unda tin continuidad di trabao. E contratanon di largo duracion. Den e sentido cu un persona tin trabao sigur y e por fia placa y desaroja su propio familia.

Tambe un otro prioridad ta turismo. E asunto di golfcourse cu tin un polemica cu gobierno. Pasobra un turista ora cu e bin Aruba mester percura pa su facilidadnan pa disfruta nan vacationnan. M.E.P. ta quere firmemente den un proyecto di fishfarming y shrimsfarming. Mester stop di dicidi cu discusion pa mira cual grupo mester worde yuda prome y privilegia ya cu ta Aruba ta yuda.

Agricultura tambe segun sr. Oduber e ta kere cu gobierno ariba un scala chiquito mester promove. Ultimo 3 aña nada nada a ser haci ariba esey. E otro asuntonan ta locual tin

den programa di M.E.P. un aseguro general di malesa, un fondo general di pensioen, cambia e ley di inkomstenbelasting, unda parcha casa ta paga belasting apart y hende muher cu lo bay haya facilidad pa paga menos belasting. Crea un fondo di spaar pa hubentud tambe ta un di e aspectonan. Sr. Oduber a bisa cu en breve esakinan ta mas importante pero tin hopi mas cu mester worde determina cu otro partnernan cu lo bay forma coalicion.

Tocante e situacion financiero actual, sr. Oduber a bisa cu e ta kere cu e gobierno no a logra traduci e desaroyo economico den un bon financia publico. Mester sanea financia publico. Pero for di awor sr. Oduber a bisa cu e gobierno no tin intencion den e prome aña di tuma ningun clase di medida, pasobra a pasa den e proceso aki caba di 1985. Locual mester haci ta busca capital, busca entrada pa gobierno y haci cu e aparato gubernamental duna servicionan mas eficiente.

Sr. Oduber a bisa cu e financia publico mester worde sanea, pero mester sa prome kico a keda atras. Di loque a tende y di cifranan cu tabata tin ta cu e situacion ta caotico y di e momento cu yega eynan lo por duna un opinion exactamente. Loque cu M.E.P. kier bisa ta pa uza e poco medianan financiero cu gobierno tin na manera mas apropiada.

Tocante un pregunta si bin investigacion den e gobernacion anterior, sr. Oduber a bisa cu ta conoci algun caso, pero e no kier bay den direccion di un persecucion politico di locual a sosode den e gobierno anterior, pasobra M.E.P. a worde tilda di tur sorto di cos. Un cos sr. Oduber a pidi gobierno pa laga tur documentonan pasobra M.E.P. sa cu tin cosnan cu a sosode y M.E.P. sa con pa haya e documentonan, y tin cos cu a sosode cu no ta bon, lo denuncianan, pero no bay drenta gobierno y cumenza cu investigacion. Si durante gobernacion constata cu tin cosnan cu no a bay bon, lo trata di actua sin distincion di esnan cu a haci nan mes culpable, pero laga e momento yega.

Sr. Oduber a bisa cu e tin den su poder un lista di computer di e partido A.V.P. caminda nan tin tur hende marca, kende ta A.V.P. kende ta M.E.P. etc. Esaki pa sr. Oduber ta un

Sigui lesa pag. 16

Nelson Oduer lo bira e *Cont pag.5*

desaroyo sumamente peligroso. Otro punto cu sr. Oduber a bisa cu e lo bay haci ta catagolisa cuanto placa A.V.P. a uza na financia publico pa campaña. Esey si lo bay duna cuenta na pueblo.

Internacionalmente e resultado a cay como sorpresa, segun sr. Oduber, pasobra locual A.N.P. tabata manda afor dia di eleccion tabata cu A.V.P. ta saca 11 bayendo pa 12 y ningun medio a duna M.E.P. mas cu 5. Sr. Oduber ta sintie sumamente orguyoso cu a mustra cu voz di pueblo ta algo sagrado. Sr. Oduber a ricibi bishita di Embahador di Caribe di Venezuela cu a felicite te na su cas y invite

como invitado especial di Presidente Carlos Andres Perez pa dia 2 di Februari na Venezuela pa toma di posicion di presidente. Tambe tin un combersacion pendiente cu Minister de Koning cu ta na Aruba actualmente.

Pa locual sr. Henny Eman a declara despues di eleccion cu e pueblo no a comprende e desaroyo economico, sr. Oduber a bisa cu e ta e no a comprende e pueblo, cera be-stuurskantoor, cana den cas ultimo 3 siman, pero honor y dignidad bal mas cu parti placa y interesante lo ta kico ta e prijs cu lo bay paga pa tur e placanan cu a ser reparti na Aruba.